



REPUBLIKA E SHQIPËRISË
KUVENDI

PROJEKTLIGJ

Nr. ____ /2018

PËR DISA SHTESA DHE NDRYSHIME NË LIGJIN NR. 10465, DATE 29.9.2011 “PËR SHËRBIMIN VETERINAR NË REPUBLIKËN E SHQIPËRISË”, I NDRYSHUAR

Në mbështetje të neneve 78, 83 pika 1, të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË
V E N D O S I:

Në ligjin nr. 10465, datë 29.09.2011 “Për shërbimin veterinar në Republikën e Shqipërisë”, i ndryshuar”, bëhen shtesat dhe ndryshimet, si më poshtë:

Neni 1

Në nenin 1 pas pikës 11 shtohet pika 12, me këtë përmbajtje:

“12. Të përcaktojë rregullat për parandalimin dhe kontrollin e sëmundjeve të transmetueshme tek kafshët ose njerëzit duke bërë të mundur:

- a) klasifikimin sipas prioritetit dhe kategorizimin e sëmundjeve, si dhe përcaktimin e përgjegjësive për mbrojtjen e shëndetit të kafshëve;
- b) miratimin dhe regjistrimin e objekteve dhe mjeteve transportuese, garantimin e lëvizjes dhe gjurmueshmërisë së ngarkesave të kafshëve, produkteve embrionale dhe produkteve me origjinë shtazore, jo për konsum human.
- c) hyrje daljen e kafshëve, produkteve embrionale dhe produkteve me origjinë shtazore, jo për konsum human në Shqipëri,
- d) vendosjen e masave urgjente që duhen marrë në rast të shpërthimit të një sëmundje”.

Neni 2

Në nenin 2 pas pikës 3 shtohet pika 4, me këtë përmbajtje:

“4. Mbrojtjen nga përhapja e sëmundjeve të trasmetueshme te kafsheve me pronar ose jo, kafshëve të egra, produktet embrionale, produktet me origjinë shtazore jo për konsum human,

subjektet, mjetet e transportit, pajisjet, si dhe çdo material që ndikon ose është i prirur të ndikojë në përhapjen e sëmundjeve të transmetueshme të kafshëve”.

Neni 3

Në nenin 3 pika ç ndryshohet si më poshtë:

“ç) Fermerët, pronarët dhe të operatorët e biznesit të mbarështimit të kafshëve.”

Neni 4

Në nenin 4 bëhen shtesat si më poshtë:

1. Pas pikës 8 shtohet pika 8/1, me këtë përmbajtje:

“8/1. “Biosiguri” është tërësia e masave menaxhuese dhe fizike të cilat kanë qëllim të reduktojnë rrezikun e hyrjes, zhvillimit ose përhapjes të sëmundjeve tek kafshët në fermë dhe/ose objekt, zonat ose çdo ambienti tjetër dhe mjetet e transportit”.

2. Pas pikës 20 shtohet pika 20/1 me këtë përmbajtje:

“20/1. “Hetim epidemiologjik” është zbulimi i origjinës së mundshme të një sëmundje të shfaqur në kafshë, me qëllim përcaktimin e shkaqeve dhe zhvillimin e mëtejshëm të sëmundjes në popullatën e kafshës së kontaminuar, duke realizuar kontrollin e pranisë dhe mënyrën e shpërndarjes së vektorëve të sëmundjes infektive, për vendosjen e strategjive të parandalimit dhe kontrollit të sëmundjes”.

3. Pas pikës 105 shtohet pika 105/1 me këtë përmbajtje:

“105/1. “Sistemi i informacionit të epidemiologjisë veterinarë” është sistemi elektronik i njoftimit të menjëhershëm të strukturave përgjegjëse në vend dhe të organizmave përkatëse ndërkombëtare për ngjarjet epidemiologjike si dhe survejancën, monitorimin dhe kontrollin e tyre”.

4. Pas pikës 106 shtohen pikat 106/1 dhe 106/2 me këtë përmbajtje:

106/1 “Stabiliment” është një objekt, ndërtesë ose strukturë në të cilën kryhet të paktën një nga aktivitetet e përmendura në këtë ligj”.

“106/2 Survejancë” është mbledhja e vazhdueshme sistematike, shqyrtimi dhe analizimi i informacionit në lidhje me shëndetin e kafshëve dhe shpërndarja në kohë e informacionit më qëllim që të merren masat përkatëse”.

5. Pika 112 ndryshon si më poshtë:

“112. “Teknik veterinar” është veterineri me arsim të mesëm profesional veterinar, që autorizohet nga shërbimi veterinar rajonal, që të kryejë disa detyra të përcaktuara në një territor, nën përgjegjësinë dhe drejtimin e një mjeku veterinar.

Neni 5

Në nenin 6 bëhen ndryshimet si më poshtë:

1. Pika 1 ndryshohet me këtë përmbajtje:

“1. Gjedhi, delet, dhitë, njëthundrakët dhe derrat i nënshtrohen identifikimit të detyrueshëm individual, në përputhje me rregulloren e miratuar nga ministri.

2. Pika 3 ndryshohet me këtë përmbajtje:

“3. Për të parandaluar, zbuluar dhe kontrolluar sëmundje infektive, si dhe për të kontrolluar tregtinë e kafshëve, me propozim të autoritetit kompetent ministri urdhëron identifikim të detyrueshëm të llojeve të tjera të kafshëve”.

Neni 6

Në nenin 7, pika 2 shfuqizohet.

Neni 7

Në nenin 9 bëhen ndryshimet si më poshtë:

1. Pika 1, shkronja b ndryshohet si më poshtë:

“b) futjen e kafshëve të paidentifikuara në kushte karantinore në karantinën shtetërore ose në vendin e destinacionit, jo më pak se 21 ditë, për matrikullimin dhe kryerjen e ekzaminimeve të nevojshme veterinarë. Kafshët e rezultuara pozitive mbas egzaminimeve eliminohen menjëherë. Të gjitha shpenzimet për egzaminimet, ditët e qëndrimit në karantinë dhe eliminimi përballohen nga pronari i kafshëve.”.

2. Pas pikës 1 shtohet pika 1/1 me këtë përmbajtje:

“2. Kafshët pa origjinë, pa pronar dhe kujdestar apo të braktisura nga pronari dhe kujdestari eliminohen dhe karkasat e tyre groposen menjëherë.

Neni 8

Në të gjithë përmbajtjen e nenit 12 fjala “qentë” zëvendësohet me fjalën “kafshët e shoqërimin”.

Neni 9

Në nenin 14 pas pikës 2 shtohet pika 3 me këtë përmbajtje:

“3. Shërbimi veterinar kryen monitorimin e sëmundjeve që janë të listuara sipas pikës 1 të këtij neni në mënyrë që të zbulojë në kohë praninë e tyre. Lista e sëmundjeve përditësohet me sëmundje të reja që shfaqen nëpërmjet mbledhjes, ruajtjes dhe analizimit të informacionit të vlefshëm në lidhje me situatën epidemiologjike”.

Neni 10

Në nenin 15 bëhen ndryshimet si më poshtë:

1. Në paragrafin 1, fljalët “shërbimi veterinar” zëvendësohen me fljalët “shërbimi veterinar rajonal”.

2. Pas shkronjës “p”, shtohet shkronja “q” me këtë përmbajtje:

“q) masa shtesë të kontrollit të sëmundjeve nga ato të parashikuara në paragrafin e parë të këtij neni mund të merren nga Shërbimi Veterinar nëse shihen të nevojshme dhe të

përshtatshme për të kontrolluar përhapjen e sëmundjes së listuar sipas pikës 1 të nenit 14 të këtij ligji, duke marrë parasysh:

- a) rrethanat e veçanta epidemiologjike;
- b) llojin e fermave dhe stabilimenteve, vendndodhjet e tjera si dhe prodhimin në fjalë;
- c) llojet dhe kategoritë e kafshëve të përfshira;
- d) kushtet ekonomike ose sociale.”

3. Pas paragrafit 1 shtohet paragrafi 2 me këtë përmbajtje:

“2. Masat shtesë të kontrollit të sëmundjeve miratohen me urdhër të Ministrit”.

Neni 11

Neni 16 ndryshohet me këtë përmbajtje:

“Neni 16

Programet vjetore të monitorimit

Autoriteti kompetent përgatit programet vjetore të profilaksisë veterinarë shtetërore, kontrollit, monitorimit dhe mbikëqyrjes së sëmundjeve me pasoja për shëndetin e kafshëve dhe shëndetin publik veterinar, mbështetur në situatën epidemiologjike në vend”. Programet miratohen me urdhër të ministrit”.

Neni 12

Në nenin 20 pika 3 ndryshohet, si më poshtë:

“3. Veterineri zyrtar merr kampionet dhe i dërgon në laboratorin veterinar, të përcaktuar për sëmundjen që dyshohet dhenjofton në sistemin e informacionit të epidemiologjisë veterinarë”.

Neni 13

Pas nenit 20 shtohet neni 20/1 me këtë përmbajtje:

“Neni 20/1

Masat paraprake profilaktike

1. Shërbimi veterinar në rast se dyshon mbi praninë e një sëmundje të listuar sipas pikës 1 të nenit 14 të këtij ligji, në pritje të rezultateve merr masat për kontrollin e sëmundjes, duke:

- a) vendosur nën mbikëqyrjen zyrtare fermat dhe/ose stabilimentet, ose në çdo vendndodhje tjetër ku sëmundja dyshohet se është shfaqur ose ka origjinën;
- b) mbajtur një regjistër të të gjithë kafshëve prezente në fermë, stabiliment, ose në çdo vendndodhje tjetër që ka rëndësi me përhapjen e mundshme të sëmundjes;
- c) siguruar që janë marrë masat e nevojshme të biosigurisë me qëllim ndalimin e përhapjes së sëmundjes tek kafshët e tjera ose tek njerëzit;
- d) vendosur në izolim kafshët e dyshuara si të prekura me qëllim ndalimin e përhapjes së sëmundjes;

e) kufizuar lëvizjet e kafshëve, të produkteve, personave, mjeteve të transportit si dhe çdo materiali ose pajisjeje tjetër me anë të cilës sëmundja mund të përhapet, me qëllim ndalimin e përhapjes së saj;

ë) ndërmarrë çdo masë tjetër të nevojshme për kontrollin e sëmundjes;

f) njoftuar ne sistemin e informacionit të epidemiologjisë veterinarë dhe filluar hetimin epidemiologjik.

2. Shërbimi veterinar në vijim të rezultateve të hetimit epidemiologjik, rishqyrton masat paraprake profilaktike sipas pikës 1 të këtij neni”.

Neni 14

Në nenin 21, pika 7 ndryshohet si më poshtë:

“7. Ministri miraton rregulloret përkatëse për masat që duhet të zbatohen në fermën e vendosur nën mbikëqyrje zyrtare, sipas pikës 2 të këtij neni, për kontrollin dhe çrënjosjen e sëmundjeve sipas situatës”.

Neni 15

Në nenin 30 pika 2 fjala “garanton” zëvendësohet me fjalën “mbikëqyr”.

Neni 16

Neni 39 ndryshohet me këtë përmbajtje:

“Neni 39

Procedurat në rast dyshimi

1. Inspektori veterinar në PIK, në rast se, gjatë importit, eksportit apo transitit të ngarkesave të përcaktuara në nenin 33 të këtij ligji, ai dyshon për sëmundje infektive, ndotje, ndryshime organoleptike të mallit apo konstaton mangësi në dokumentacionin e parashikuar në pikat 1 dhe 2 të nenit 38 të këtij ligji urdhëron si më poshtë vijon:

a) bllokimin e ngarkesës në PIK;

b) rikontrollin veterinar me analiza laboratorike të specifikuara;

c) konfiskimin, eliminimin dhe groposjen e mallit;

ç) kthimin mbrapsht të ngarkesës sipas nenit 40 të këtij ligji;

d) shoqërimin e ngarkesës për në pikën më të afërt të karantinës ose në vendin e destinacionit, ku do t’i nënshtrohet masave karantine, të përcaktuara në këtë ligj dhe në aktet nënligjore

dh) masa të tjera parandaluese e mjekuese, sipas legjislacionit veterinar në fuqi.

2. Për masat e marra sipas pikës 1 të këtij neni, ai mban procesverbalin e inspektimit dhe njofton menjëherë autoritetin kompetent për PIK-në, i cili njofton autoritetin kompetent dhe shërbimin veterinar rajonal.

3. Të gjitha shpenzimet për masat e marra, sipas pikës 1 të këtij neni, mbulohen nga pronari ose personi përgjegjës për ngarkesën.

Neni 17

Në nenin 43 bëhen ndryshimet, si më poshtë:

1. Në pikën 1 dhe 2 bëhet ky ndryshim:

Togfjalëshi "...urdrin e përkohshëm, të lëshuar nga autoriteti kompetent,..." zëvendësohet me "...urdhërin e ministrit,"

2. Pika 3 ndryshohet, si më poshtë:

"3. Me propozim të autoritetit kompetent, në përputhje me Kodin Shëndetësor të Kafshëve të Tokës dhe të Ujit, të OIE-së, ministri miraton urdhërin për shfuqizimin e masave veterinarë për sëmundjet infektive sipas pikave 1 dhe 2 të këtij neni".

Neni 18

Neni 48 ndryshohet me këtë përmbajtje:

"Neni 48

Masat e autoritetit kompetent

Ministri me propozim të autoritetit kompetent, mbështetur në listën e sëmundjeve infektive, nxjerr urdhrin për marrjen e njëres prej masave të mëposhtme:

- a) eliminimin e kafshëve të sëmura, të dyshuara si të sëmura ose të ekspozuara kundrejt infeksionit;
- b) asgjësimin e kadavrave, produkteve të kafshëve, produkteve embrionale, të lëndëve të papërpunuara dhe të pajisjeve e mjeteve në një vatër të sëmundjes, që paraqet rrezik për shëndetin e kafshëve".

Neni 19

Në nenin 49 togfjalëshi "autoriteti kompetent" zëvendësohet me togfjalëshin "Shërbimi veterinar".

Neni 20

Në nenin 51 bëhen ndryshimet, si më poshtë:

1. Në pikën 1 bëhen këto ndryshime:

- a) shkronja "f" ndryshohet me këtë përmbajtje:

"f) të zbatojnë kërkesat për mbrojtjen e shëndetit dhe mirëqenien e kafshëve si dhe të zbatojnë masat e biosigurisë".

- b. pas shkronjës "g" shtohet shkronja "h", me këtë përmbajtje:

“h) Të marrë masat e përshtatshme të biosigurisë sipas:

- i. llojeve dhe kategorive të kafshëve ;
- ii. llojin e mbarështimit;
- iii. rreziqet e mundshme duke përfshirë vendodhjen gjeografike dhe kushtet klimaterike si dhe rrethanat dhe praktikatat e zonës në fjalë”.

2. Pas pikës 1 shtohet pika 1/1 me këtë përmbajtje:

“1/1. Ministri miraton rregullat mbi masat e biosigurisë që zbatohen në fermë”.

Neni 21

Neni 54 ndryshohet me këtë përmbajtje:

“Neni 54

Njësitë e qeverisjes vendore

1. Njësitë e qeverisjes vendore duhet:

- a) bashkëpunojnë me autoritetin kompetent dhe strukturat e shërbimit veterinar rajonal për zbatimin e masave profilaktike, si dhe për kufizimin dhe çrrënjosjen e sëmundjeve infektive në kafshë;
- b) bashkëpunojnë me autoritetin kompetent dhe strukturat e shërbimit veterinar rajonal për zbatimin e legjisllacionit veterinar në funksionimin e tregjeve të kafshëve të gjalla, thertoreve dhe kullotave;
- c) mbajnë nën kontroll dhe të zbatojnë kërkesat e këtij ligji për kontrollin e qenve dhe maceve të rrugës duke bashkëpunuar me shërbimin veterinar rajonal;
- ç) përcaktojnë vendet e groposjes ose të grumbullimit të kadavrave të kafshëve dhe të bashkëpunojnë për eliminimin e tyre;
- d) marrin masa për rrethimin dhe ruajtjen e pikave të grumbullimit të mbetjeve dhe vendgroposjes së kadavrave si dhe të ndalojnë hyrjen e kafshëve atje”.

2. Detyrat dhe bashkëpunimi sipas pikës 1 të këtij neni përcaktohen me Vendim të Këshillit të Ministrave.

Neni 22

Në nenin 58 pika 3 ndryshohet, si më poshtë:

“3. Autoriteti kompetent kryen mbikqyrjen e dokumentave mjekësore veterinare për përputhjen e tyre me kërkesat e përcaktuara për procedurën e lëshimit të tyre”.

Neni 23

Në nenin 61 pikat 1 dhe 2 ndryshojnë, si më poshtë:

“1. Subjektet që merren me organizmin e ekspozitave, kopshteve zoologjike shëtitëse, transportin e kafshëve që udhëtojnë me trupat e cirkut, me organizimin e panairëve e të shitjeve të organizuara të kafshëve, jashtë mjediseve të stallave dhe stabilimenteve, njoftojnë

paraprkisht, me shkrim shërbimin veterinar rajonal për vendin, datën dhe orën e zhvillimit të veprimtarisë.

2. Shërbimi veterinar rajonal miraton ose refuzon kërkesën për kryerjen e veprimtarive të parashikuara në këtë nen.”.

Neni 24

Në nenin 62, pika 3 ndryshohet si më poshtë:

“3. Veterineri zyrtar urdhëron eliminimin e detyrueshëm në vend për kafshët me dëmtime të rënda dhe të pashërueshme dhe njofton autoritetin kompetent dhe njësitë e vetëqeverisjes vendore”.

Neni 25

Neni 63 ndryshohet si më poshtë:

“Personi fizik apo juridik që grumbullon, përpunon apo tregton lëkurë kafshësh vërteton dhe dokumenton origjinën e lëkurëve të blera përmes certifikatës veterinare të origjinës. Të dhënat mbahen në regjistrin sipas modelit të miratuar nga ministri”

Neni 26

Pas nenit 64 shtohet neni 64/1, me këtë përmbajtje:

“Neni 64/1

Transporti i kafshëve të egra tokësore

1., Transporti i kafshëve të egra tokësore brenda territorit të Republikës së Shqipërisë ose në një shtet tjetër, vetëm kur:

- a) nuk vijnë nga një vendbanim në një zonë e cila është subjekt i kufizimeve të lëvizjes për shkak të një sëmundje të shfaqur që prek këtë specie të kafshëve;
- b) kafshët e egra shoqërohen me një certifikatë shëndetësore ose dokumente të tjera veterinare të përcaktuara nga Autoriteti kompetent, dhe ku certifikimi i shëndetit të kafshëve është i nevojshëm për të siguruar përputhshmërinë me kërkesat e shëndetit të kafshëve për lëvizjet e parashikuara;
- c) Autoriteti kompetent se bashku me autoritetin kompetent të destinacionit në rastin e një shteti tjetër, kanë rënë dakort për një lëvizje të tillë.

2. Çdo lëvizje e kafshëve të egra drejt Shqipërisë nga një shtet tjetër, duhet të përmbushë të gjitha kushtet e parashikuara në pikën 1 të këtij neni.

3. Rregullat e hollësishme për lëvizjen e kafshëve të egra brenda dhe jashtë territorit të Republikës së Shqipërisë miratohen me urdhër ministri”.

Neni 27

Në nenin 85, bëhen ndryshimet dhe shtesat si më poshtë:

1. Pika 3 ndryshohet si më poshtë: “3. Komisioni Shtetëror i PMV-ve pranon për regjistrim PMV-të që kanë certifikatë tregëtimi dhe tregtohen në një nga vendet e BE-së ose PMV-të e paisura me certifikatë tregëtimi të lëshuar nga Agjencia Evropiane e Medikamenteve (EMA)”.

2. Në pikën 4 togfjalëshi “brenda 10 ditëve kalendarike nga data e miratimit prej komisionit” ndryshohet në “brenda 10 ditë pune pas pagesës nga kërkuesi të tarifës së përcaktuar për regjistrim”.

Neni 28

Neni 87 pika 1 ndryshohet si më poshtë:

“1. Shqyrtimi i dosjes së PMV-ve, miratimi nga Komisioni Shtetëror i PMV-ve të përcaktuara në nenin 85, pika 3 dhe lëshimi i certifikatës së tregëtit kryhen brenda një afati prej 100 ditësh nga data e dorëzimit të kërkesës dhe dosjes së plotë nga kërkuesi”.

Neni 29

Në nenin 102 pas pikës 6 shtohen pikat 7, 8 dhe 9, me këtë përmbajtje:

“7. Autoriteti Kompetent, për përdorimin e PMV-ve për parandalimin dhe kontrollin e sëmundjeve, bazohet në:

- a) karakteristikat dhe profilin e sëmundjes;
- b) përhapjen e sëmundjes në Shqipëri, në vende fqinje nga ka ardhur sëmundja;
- c) disponueshmërinë, efikasitetin dhe rreziqet që paraqesin këto PMV në mirëqenien e kafshëve;
- d) disponueshmërinë e testeve diagnostikuese për të zbuluar infeksionet tek kafshët;
- e) pasojat ekonomike, sociale dhe ndikimi mjedisor që sjell përdorimi i këtyre PMV-ve në krahasim me strategjitë e tjera për parandalimin dhe kontrollin e sëmundjeve.

8. Rregullat mbi përdorimin e PMV-ve sipas këtij neni, miratohen me urdhër Ministri.

9. Autoriteti kompetent merr masat e duhura për të mbrojtur shëndetin e kafshëve dhe shëndetin publik në lidhje me përdorimin e PMV-ve për studime shkencore ose për qëllime të zhvillimit dhe testimit të tyre në kushte të kontrolluara.”

Neni 30

Në titullin e nenit 105 fjala “Zbatim” zëvendësohet me fjalën “Ushtrim”.

Neni 31

Në nenin 106, pika 1 ndryshon me këtë përmbajtje

1. Veprimtaritë veterinarë kryhen nga:

- a. veterinerët zyrtarë.

- b. mjekët veterinarë, persona fizikë dhe juridikë në njësi të shërbimit veterinar privat në:
- i. klinikat dhe spitalet veterinare;
 - ii. qendrat për riprodhimin dhe ndërzimin artificial;
 - iii. njësitë e tregëtimit me shumicë të PMV-ve dhe farmacitë veterinare;
 - iv. laboratorët veterinarë.
 - v. fermat blegtorale, parqet dhe kopshtet zoologjike e të tjera.

Neni 32

Në nenin 108, togfjalëshi “praktikës mjekësore veterinare” ndryshon në “profesionit të mjekut veteriner”.

Neni 33

Në nenin 109, bëhen ndryshimet si më poshtë:

1. Pika 1 riformulohet:

“1. Mjekët veterinarë mund të ushtrojnë profesionin në shërbimin veterinar shtetëror ose sektorin veterinar privat, në përputhje me dispozitat ligjore që rregullojnë profesionet e lira në Republikën e Shqipërisë.”.

2. Në pikën 2, në fund të fjalisë “autoriteti kompetent” zëvendësohet me “Ministri”.

Neni 34

Në nenin 112, në pikën 2, në fund të fjalisë shtohet togfjalëshi “të miratuar me urdhër Ministri”.

Neni 35

Në nenin 114 , pas pikës 3 shtohet pika 4 me këtë përmbajtje

“4. Ministri miraton rregulloren për funksionimin e klinikave dhe spitalit veterinar.”

Neni 36

Neni 116 ndryshohet si më poshtë:

“Neni 116

Shërbimi veterinar në raste emergjente dhe nevojash

Në raste emergjente dhe nevojash, kur situata nuk përballohet nga shërbimi veterinar shtetëror, ministri me propozim te autoritetit kompetent urdhëron strukturat rajonale për kontraktimin me veterinarë privatë, teknikë veterinarë, klinika veterinare dhe njësi të tjera të shërbimit veterinar privat të përcaktuara në këtë ligj. Procedura dhe Kriteret e kontraktimit përcaktohet me urdhër ministri.

Neni 37

Neni 117 shfuqizohet.

Neni 38

Në nenin 122 pas pikës 3 shtohet pika 4, me këtë përmbajtje:

“4. Laboratorët, objektet dhe personat e tjerë fizike ose juridike të cilët përdorin agjentë patogjenë me qëllim kërkimin shkencor, edukimin, diagnostikimin ose prodhimin e vaksinave ose produkteve të tjera biologjike, përveçse të bazohen në standartet ndërkombëtare përkatëse, duhet:

a) të marrin masat në lidhje me biosigurinë dhe të izolimit biologjik me qëllim ndalimin e përhapjes së agjentëve patogjenë dhe kontaktin e tyre me kafshët, jashtë laboratorëve ose objekteve të tjera ku këto agjentë përdoren;

b) të kujdesen që lëvizja e këtyre agjenteve patogjenë, vaksinave dhe produkteve të tjera biologjike nga laboratorët dhe objekteve të tjera të mos shkaktojë rreziqe përhapjeje të sëmundjeve”.

Neni 39

Në nenin 123 pika 1 ndryshon me këtë përmbajtje:

“1. Instituti i Sigurisë Ushqimore dhe Veterinarisë (ISUV) është Qendër Kombëtare e Referencës Laboratorike Veterinare dhe qendër kërkimore shkencore.

a. ISUV është institucion qendror, në varësi të ministrit, dhe pjesë e rrjetit të shërbimit veterinar kombëtar.

b. ISUV kryen punë kërkimore shkencore me shpenzime që përballohen nga shteti, sipas akteve nënligjore përkatëse, gjithashtu, krijon të ardhura të tjera nga burime të ligjshme dhe ka pavarësi në veprimtarinë e vet financiare për shërbimet që kryen.

c. Mënyra e organizimit dhe funksionimit të ISUV përcaktohet me Vendim të Këshillit të Ministrave me propozim të ministrit. Punonjësit e ISUV që kryejnë funksione kërkimore-shkencore trajtohen me pagë sipas statusit të punonjësve me grada dhe tituj shkencore”.

Neni 40

Në nenin 127 pika 1 ndryshon me këtë përmbajtje:

“1. Shërbimi veterinar organizohet si sistem i njësuar me vartësi vertikale dhe ushtron veprimtarinë, sipas përcaktimeve të këtij ligji, në të gjithë territorin e Republikës së Shqipërisë. Shërbimi veterinar drejtohet nga autoriteti kompetent”

Neni 41

Neni 128 ndryshohet si më poshtë:

“Neni 128

Përbërja e shërbimit veterinar

1. Shërbimi veterinar kombëtar perbehet nga:

- a. autoriteti kompetent
 - b. Shërbimi veterinar rajonal.
 - c. Shërbimi veterinar privat.
2. Organizimi dhe funksionimi i shërbimit veterinar rajonal përcaktohet me Vendim të Këshillit të Ministrave”.

Neni 42

Në nenin 129 pas shkronjës “h” shtohet shkronja “j” me këtë përmbajtje:

- “j) bashkëpunon dhe lidh marrëveshje me Policinë e Shtetit me qëllim garantimin e zbatimit të këtij ligji”.

Neni 43

Neni 130 ndryshohet si më poshtë:

“Neni 130

Fusha e veprimtarisë së shërbimit veterinar rajonal

1. Shërbimi veterinar rajonal përbëhet nga veterineret zyrtare dhe e ushtron veprimtarinë në:
- a) fermat e rritjes dhe mbarështimit të kafshëve;
 - b) pikat e grumbullimit dhe pikat e pushimit të kafshëve;
 - c) qendrat e karantinës shtetërore;
 - ç) qendrat e riprodhimit dhe ndërzimit artificial;
 - d) qendrat e grumbullim-përpunimit të produkteve me origjinë shtazore, jo për konsum njerëzor apo kafshë;
 - dh) njësitë e shërbimit veterinar privat, sipas përcaktimit të këtij ligji.
 - e) thertore;
 - f) njësitë e shitjes së kafshëve të shoqërimit dhe zbukurimit;
 - g) njësitë e tregtisë së kafshëve, produkteve embrionale, produkteve mjeksore veterinare, nënprodukteve dhe produkteve me origjinë shtazore, jo për konsum njerëzor.
2. Shërbimi veterinar rajonal mbështet autoritetin përgjegjës për kontrollin e ushqimeve gjatë kryerjes së procesit të gjurmimit, përgjatë të gjithë zinxhirit ushqimor të produkteve ushqimore me origjinë shtazore, të rasteve jo konforme ose të dyshimta, të evidentuara gjatë kryerjes së aktivitetit të tij të përcaktuar me ligj.

Neni 44

Neni 131 ndryshohet si më poshtë:

“Neni 131

Veterineri zyrtar

Veterineri zyrtar kryen veprimtari kontrolli ose shërbimi në territorin ku ushtron veprimtarinë.

a. Veprimtari kontrolli që përfshin:

1. Lëshimin e certifikatës shëndetësore veterinarë sipas përcaktimeve të pikës 1 të nenit 55 të këtij ligji.
2. Në kuadër të Planit Kombëtar të Monitorimit Mbetjeve dhe në bazë të sëmundjeve infektive të përcaktuara në listën përkatëse, merr kampione dhe materiale patologjike për analiza, me qëllim kontrollin e shëndetit të kafshëve, të cilat i dërgon në laboratorët veterinarë.
3. Në rastet e sëmundjeve infektive të përcaktuara në listën përkatëse, ndalon lëvizjen e kafshëve, të produkteve primare me origjinë shtazore, produkteve me origjinë shtazore, jo për konsum njerëzor, produkteve mjekësore veterinarë, produkteve embrionale, si dhe të mbeturinave shtazore.
4. Kontrollon dhe pezullon veprimtarinë e fermave për mbarështimin, prodhimin dhe tregtimin e kafshëve, produkteve embrionale, materialeve të papërpunuara me origjinë shtazore, në rastet e mospërputhjes me standardet sanitaro-veterinarë, si dhe në rastet e përcaktuara në pikën 3 të këtij neni.
5. Konfiskon dhe urdhëron asgjësimin e produkteve me origjinë shtazore, jo për konsum njerëzor, të papërshtatshme nga ana sanitaro-veterinarë, si dhe produktet mjekësore veterinarë.
6. Mbikëqyr veprimtarinë e organizmave veterinarë privatë, të cilave ua pezullon veprimtarinë kur vëren mosrespektimin e kushteve të përcaktuara për licencimin e tyre.
7. Zbatimin e masave për parandalimin, zbulimin, kontrollin dhe çrrënjosjen e sëmundjeve infektive të kafshëve dhe për mbrojtjen e shëndetit publik nga zoonozat;
8. zbatimin e masave veterinarë për mbrojtjen e shëndetit dhe të mirëqenies së kafshëve;
9. zbatimin e veprimtarive veterinarë nga shërbimet veterinarë private;
10. përputhjen me standardet sanitaro-veterinarë në fermat blegtorale, në rritjen e kafshëve të destinuara për eksperimente, në inkubatorët, rezervatet, qendrat e grumbullimit, tregjet e kafshëve të gjalla, qendrat e blerjeve dhe pikat e pushimit të kafshëve, kopshtet zoologjike ose miniparqet;
11. përputhjen me standardet sanitaro-veterinarë të stabilimenteve të prodhimit dhe të ruajtjes së spermës së kafshëve e vezëve të fekunduara;
12. përputhjen me standardet sanitaro-veterinarë të mjeteve të transportit, të përdorura për transportin e kafshëve dhe mënyrën e transportit të kafshëve;
13. mbetjet e substancave të dëmshme në kafshë;
14. zbatimin e masave veterinarë në mbajtjen, prodhimin dhe tregtimin e kafshëve;
15. identifikimin e kafshëve, regjistrimin e fermave blegtorale dhe veprimtarinë e personave fizikë ose juridikë, të autorizuar për identifikimin;
16. prodhimin, ruajtjen, tregtimin dhe përdorimin e produkteve mjekësore veterinarë;

17. prodhimin, ruajtjen, tregtimin dhe përdorimin e dezinfektantëve, dezinfektantëve, deratizuesve, si dhe përdorimin e mjeteve me anë të të cilave kryhen dezinfektimi, dezinfektimi dhe deratizimi;
18. dokumentacionin dhe regjistrat e fermave dhe të stabilimenteve blegtorale, klinikave dhe farmacive veterinarë, stabilimenteve të prodhimit dhe ruajtjes së spermës së kafshëve e vezëve të fekunduara, në lidhje me zbatimin e legjislacionit veterinar;
19. dezinfektimin e mjeteve të transportit, të përdorura për dërgimin e ngarkesave të kafshëve dhe mbeturinave me origjinë shtazore;
20. zbatimin e masave karantinore për kafshët dhe produktet me origjinë shtazore, në rastet e shpërthimeve të sëmundjeve infektive;
21. zbatimin e masave të tjera të përcaktuara, kur kërcënohen shëndeti dhe mirëqenia e kafshëve;
22. Në mjediset e thertoreve kryen kontrollin veterinar të kafshës para dhe pas therjes, vulosjen e karkasave të mishit dhe lëshimin e çertifikatës veterinarë, që shoqëron mishin dhe nënproduktet e kafshëve. Kriteret dhe kushtet e kontrollit veterinar në mjediset e thertoreve miratohen me urdhër Ministri.
23. Kryen kontrollin veterinar në tregjet e kafshëve të gjalla dhe kullota dhe në varësi të situatës epidemiologjike ndalon përdorimin e tyre.
24. Kontrollon njësitë e shitjes së kafshëve të shoqërimit dhe zbukurimit.
25. Mbikëqyr mbledhjen, grumbullimin dhe groposjen e kadvrave të kafshëve”.
26. vendosjen e masave kur vërehen kundërvajtje administrative, në zbatim të nenit 134 të këtij ligji.

b. Veprimtari shërbimi që përfshin:

1. identifikimin dhe regjistrimin e fermës dhe matrikullimin e kafshëve të prodhimit ose i kafshëve të tjera, si dhe i kafshëve të reja në fermë, sipas rregullores përkatëse;
2. rimatrikullimi i kafshëve që nuk plotësojnë kërkesat e identifikimit, sipas rregullores përkatëse;
3. zbatimi praktik i programeve të profilaksisë shtetërore për sëmundjet në kafshë në një njësi administrative të përcaktuar;
4. zbatimi i masave për kontrollin dhe çrënjosjen e sëmundjeve infektive në kafshë, në vatrat e shpërthimeve.

c. Në rastet e sëmundjeve zoonotike, informon AKU dhe strukturat përkatëse të shëndetit publik.

d. Ministri miraton formatet e listave të kontrollit sipas fushave të veprimtarisë së veterinerit zyrtar.

Neni 45

Në nenin 134, në pikën 1.3 shkronja “a” shtohet nëndarja “vi” me këtë përmbajtje:

“vi) vepron në kundërshtim me nenet 15 e 92 të këtij ligji.

Neni 46

Nenin 137 ndryshohet si më poshtë:

“Neni 137

Liçencimi, anulimi dhe shfuqizimi i veprimtarive

1. Veprimtaritë e kryera për qëllime të natyrës ekonomike, tregtare, profesionale dhe çdo natyre tjetër të ngjashme, përveç atyre të natyrës vetjake, që parashikohen në këtë ligj, licencohen dhe anulohen dhe shfuqizohen sipas kategorive e nënkategorive respektive të fushës II të shtojcës së ligjit nr. 10081, datë 23.2.2009 "Për licencat, autorizimet dhe lejet në Republikën e Shqipërisë", i ndryshuar”.

2. Veterineri zyrtar në rast se gjatë kontrollit konstaton se pas ndëshkimit për shkeljet e përcaktuara në nenin 15, 29, 30, 51, 83, 92, 94 dhe 96 nuk janë marrë masat korrigjuese brenda afatit të përcaktuar në procesverbalin e inspektimit i dërgon menjëherë autoritetit kompetent procesverbalin e inspektimit dhe propozimin për anulimin ose shfuqizimin e licencës së aktivitetit të subjektit. Autoriteti kompetent brenda 30 ditëve nga data e njoftimit të procesverbalit të subjektit të inspektimit merr vendimin për anulimin ose shfuqizimin e licencës së aktivitetit.

Neni 47

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

KRYETARI

GRAMOZ RUÇI